



REPUBLIKA E SHQIPËRISË
KOMISIONI QENDROR I ZGJEDHJEVE

KOMISIONI RREGULLATOR

Data: 02.03 2021

Nr: 07

VENDIM

PËR CAKTIMIN E PERSONELIT TË KUALIFIKUAR PËR PËRDORIMIN E PAJISJEVE TË TEKNOLOGJISË SË INFORMACIONIT NË QENDRËN E VOTIMIT

Komisioni Rregullator, në mbledhjen e tij të datës 02.03 .2021, me pjesëmarrjen e:

Ilirjana	NANO -	Kryetare
Arens	ÇELA -	Anëtar
Dritan	ÇAKA -	Anëtar
Helga	VUKAJ -	Anëtare
Muharrem	ÇAKAJ -	Anëtar

shqyrtoi çështjen me:

OBJEKT: Për caktimin e personelit të kualifikuar për përdorimin e pajisjeve të teknologjisë së informacionit në qendrat e votimit.

BAZA LIGJORE: Neni 20, paragrafët 1, shkronja “ë”, dhe 2, neni 23, të ligjit nr.10019 datë 29.12.2008 “Kodi Zgjedhor i Republikës së Shqipërisë”, të ndryshuar.

Komisioni Rregullator pasi shqyrtoi dokumentacionin e paraqitur nga Komisioneri Shtetëror i Zgjedhjeve dhe dëgjoji diskutimet e të pranishmëve, në zbatim të kompetencës së parashikuar në nenin 20, paragrafi 1, shkronja “ë”, të ligjit nr.10019, datë 29.12.2008 “Kodi Zgjedhor i Republikës së Shqipërisë”, të ndryshuar,

VËREN



Data: 02.03 2021

Nr. 07

Për caktimin e personelit të kualifikuar për përdorimin e pajisjeve të teknologjisë së informacionit në qendrat e votimit.

Komisioni Rregullator, me vendimin nr. 2, datë 31.10.2020 “Për llojin dhe karakteristikat teknike që duhet të plotësojnë sistemet dhe pajisjet e identifikimit elektronik të zgjedhësve që do të prokurohen dhe përdoren në Republikën e Shqipërisë”, ka vendosur që në zgjedhjet për Kuvendin të datës 25 Prill 2021, procesi i identifikimit elektronik të zgjedhësve në të gjithë qendrat e votimit në territorin e vendit do të kryhet me pajisje të identifikimit elektronik si dhe ka përcaktuar përdorimin e këtyre pajisjeve nga persona përgjegjës, operatorë.

Referuar parashikimeve të nenit 23 të Kodit Zgjedhor, pajisjet e teknologjisë së informacionit në zgjedhje vihen në përdorim nga personeli i kualifikuar i KQZ-së, i punësuar për këtë qëllim. Ky përcaktim ligjor tregon se legjislatori ka kërkuar të garantojë në mënyrë të posaçme përdorimin dhe funksionalitetin e sigurt të pajisjeve të teknologjisë së informacionit që do të përdoren për identifikimin elektronik të zgjedhësve gjatë ditës së votimit.

PËR KËTO ARSYE:

Komisioni Rregullator, bazuar në nenin 20, paragrafët 1, shkronjat “ë” dhe 2, nenin 23, të ligjit nr.10019 datë 29.12.2008 “Kodi Zgjedhor i Republikës së Shqipërisë”, të ndryshuar,

V E N D O S I:

Neni 1

Qëllimi dhe objekti

1. Qëllimi i këtij vendimi është përcaktimi i rregullave të pranimit dhe të trajnimit të personelit që do të caktohet nga Komisioni Qendror i Zgjedhjeve (KQZ) si operator teknik për përdorimin e pajisjeve të teknologjisë së informacionit për identifikimin elektronik të zgjedhësve në qendrat e votimit (QV).
2. Objekti i këtij vendimi është të përcaktojë:
 - a) kushtet dhe kriteret që duhet të plotësojë shtetasi shqiptar që caktohet si operator teknik për përdorimin e pajisjes së identifikimit elektronik të zgjedhësve (PEI);
 - b) procedurat e përzgjedhjes dhe të caktimit të operatorit teknik;
 - c) detyrat dhe përgjegjësitë e operatorit teknik gjatë ofrimit të shërbimit.



Data: 02.03 2021
Nr. 07

Për caktimin e personelit të kualifikuar për përdorimin e pajisjeve të teknologjisë së informacionit në qendrat e votimit.

Neni 2

Papajtueshmëritë me detyrën e operatorit teknik

1. Nuk mund të caktohet si operator teknik, shtetasi i cili:
 - a) ka marrëdhënie krushqie të afërt ose gjinie deri në shkallë të katërt, ose marrëdhënie pune me ndonjërin nga kandidatët që konkurojnë në zonën zgjedhore ku ndodhet qendra e votimit në të cilën operatori teknik është caktuar;
 - b) është ushtarak, punonjës i strukturave të Policisë së Shtetit, Gardës së Republikës, Ministrisë së Brendshme, i Shërbimit Informativ Shtetëror, Agjencisë së Inteligjencës dhe Sigurisë së Mbrojtjes, Shërbimit të Çështjeve të Brendshme dhe Ankesave dhe shërbimeve të tjera me objekt veprimtarie të ngjashme me sa më sipër.

Neni 3

Kushtet për t'u caktuar operator teknik

1. Pranimi i operatorëve teknikë bëhet në bazë të parimit të konkurimit të hapur.
2. Kandidati për operator teknik duhet të plotësoj kushtet si më poshtë:
 - a) gëzon të drejtën për të qenë zgjedhës;
 - b) nuk është dënuar me vendim gjyqësor të formës së prerë për kryerjen me dashje të një vepre penale;
 - c) ka të paktën arsim të mesëm;
 - ç) nuk ka qenë pjesë e administratës zgjedhore në dy proceset e fundit zgjedhore;
 - d) nuk është anëtar i strukturave drejtuese të ndonjë partie politike, të paktën tre vitet e fundit;
 - dh) nuk ka qenë i përfshirë publikisht në veprimtari dhe aktivitete politike dhe elektorale për llogari të një subjekti zgjedhor në 5 vitet e fundit.
 - e) të ketë njohuri dhe aftësi minimale të përdorimit të pajisjeve të teknologjisë së informacionit si kompjuter, smartphone, etj;
 - ë) të jetë i gatshëm për të ofruar shërbimin edhe larg vendbanimit.
3. Operatori teknik duhet të jetë me vendbanim në territorin e qarkut ku ndodhet qendra e votimit ku ai do të caktohet nga KQZ. Caktimi i operatorit teknik në qendrën përkatëse të votimit bëhet me short mes kandidatëve të përzgjedhur për qarkun përkatës.



Data: 02.03 2021
Nr. 07

Për caktimin e personelit të kualifikuar për përdorimin e pajisjeve të teknologjisë së informacionit në qendrat e votimit.

Neni 4

Përparësia në përzgjedhje

1. Përzgjedhja e operatorëve teknikë për përdorimin e PEI do të ndjekë këtë rend përparësie:
 - a) Studentët në master (jo pjesë e administratës publike);
 - b) Studentët në bachelor (jo pjesë e administratës publike).
2. Nëse numri i operatorëve të kërkuar nuk plotësohet nga kategoritë e mësipërme, KQZ vijon me rekrutimin nga kategori të tjera të lejuara sipas këtij vendimi.

Neni 5

Paraqitja e kërkesës

1. Komisioneri Shtetëror i Zgjedhjeve, jo më vonë se 24 orë nga hyrja në fuqi e këtij vendimi, shpall publikisht, thirrjen për shprehje interesi nga shtetas të cilët janë të gatshëm të ofrojnë shërbimin si operator teknik për përdorimin e pajisjes së identifikimit elektronik të zgjedhësve në qendrën e votimit.
2. Thirrja publike sipas pikës 1, të këtij neni, përmban kushtet dhe kriteret e përcaktuara në këtë vendim për kandidatët për operatorë teknikë, si dhe mënyrën dhe afatin e aplikimit.
3. Aplikimi nga të interesuarit kryhet në faqen zyrtare të KQZ-së, në një rubrikë të veçantë të krijuar për këtë qëllim. Shtetasit e interesuar vetëdeklarojnë lidhur me të dhënat e kërkuara për përmbushje të kërkesave, duke plotësuar fushat përkatëse dhe dërgojnë në rrugë elektronike në KQZ formatin e plotësuar.
4. Mosdeklarimi i saktë i të dhënave ose deklarimi i rremë i tyre passjell sipas rastit përgjegjësi penale ose administrative për aplikuesin.

Neni 6

Procedurat e shqyrtimit të kërkesave

1. Jo më vonë se 15 (pesëmbëdhjetë) ditë para datës së zgjedhjeve, struktura përgjegjëse e administratës së KQZ-së, përgatit listën e shtetasve të cilët përmbushin kërkesat dhe kushtet për të qenë operator teknik, sipas përcaktimeve të neneve 2 dhe 3, të këtij vendimi.
2. Shtetasit e përzgjedhur sipas parashikimeve të pikës 1 të këtij neni, i nënshtrohen trajnimit dhe testimit të njohurive për shërbimin si operator teknik.



Data: 02.03 2021
Nr. 07

Për caktimin e personelit të kualifikuar për përdorimin e pajisjeve të teknologjisë së informacionit në qendrat e votimit.

3. Shtetasit e përzgjedhur sipas parashikimeve të pikës 1, të këtij neni, të cilët nuk marrin pjesë në trajnim, apo nuk kalojnë testimin sipas parashikimeve të pikës 2, të këtij neni, nuk mundet të caktohen si operator teknikë.
4. Procesi i parashikuar në pikat 1, 2 dhe 3 të këtij neni drejtohet, mbikëqyret dhe monitorohet nga Nënkomisioneri Shtetëror i Zgjedhjeve.

Neni 7

Caktimi i operatorëve teknikë

1. Jo më vonë se 7 (shtatë) ditë përpara ditës së zgjedhjeve Komisioneri Shtetëror i Zgjedhjeve dhe Nënkomisioneri caktojnë operator teknikë shtetasit e përzgjedhur sipas nenit 6, të këtij vendimi.
2. Në kontratën e shërbimit përcaktohet numri i qendrës së votimit ku shtetasi i përzgjedhur caktohet si operator.
3. KQZ dhe shtetasi i përzgjedhur si operator nënshkruajnë kontratën përkatëse të shërbimit
4. Nëse për shkaqe të ndryshme operatori teknik i caktuar nuk paraqitet për ofrimin e shërbimit, në vend të tij caktohet një person tjetër i cili është në listën e personave të përzgjedhur, sipas nenit 6, të këtij vendimi.

Neni 8

Detyrat e operatorit teknik

Gjatë ditës së zgjedhjeve, operatori teknik kryen këto detyra:

- a) në orën 6:00 paraqitet në qendrën e votimit ku është caktuar, me dokumentin personal të identifikimit, si dhe me aktin e caktimit dhe/ose vërtetimin përkatës të pajisur nga KQZ.
- b) përpara orës 7:00 të hapjes së votimit:
 - i. aktivizon pajisjen e identifikimit elektronik të zgjedhësve, në prani të anëtarëve të KQV-së dhe vëzhguesve;
 - ii. dorëzon menjëherë tek anëtarët e KQV-së raportin që pajisja e identifikimit elektronik të zgjedhësve (PEI) printon pas aktivizimit të saj.
- c) gjatë zhvillimit të votimit:
 - i. përdor pajisjen e identifikimit elektronik të zgjedhësve në përputhje me manualin teknik të përdorimit të saj;
 - ii. informon anëtarët e KQV-së, për veprimet që kryhen prej tij, si dhe për funksionalitetin e pajisjes së identifikimit elektronik të zgjedhësve;



Data: 02.03 2021
Nr. 07

Për caktimin e personelit të kualifikuar për përdorimin e pajisjeve të teknologjisë së informacionit në qendrat e votimit.

- iii. zbaton, në çdo rast, vendimin e KQV-së për autorizimin e kryerjes së identifikimit elektronik të zgjedhësit për rastet e parashikuara në aktet e KQZ-së;
- iv. dorëzon tek Kryetari i KQV-së çdo vërtetim të kryerjes së verifikimit të zgjedhësit, të printuar nga pajisja e identifikimit elektronik (PEI);
- v. kryen menjëherë njoftimin në qendrën operacionale të asistencës teknike, për çdo problem lidhur me funksionalitetin e pajisjes së identifikimit elektronik të zgjedhësve (PEI);
- vi. zbaton me përpikmëri instruksionet e dhëna nga personeli i qendrës operacionale të asistencës teknike.
- vii. Dërgon në KQZ raportet periodike, të gjeneruara nga PEI, mbi pjesëmarrjen në zgjedhje në atë qendër votimi,

ç) në mbyllje të votimit:

- i. zbaton vendimin e KQV-së për mbylljen e procesit të votimit;
- ii. dorëzon menjëherë tek anëtarët e KQV-së raportin që pajisja e identifikimit elektronik të zgjedhësve printon pas mbylljes së procesit të identifikimit të zgjedhësve;
- iii. nënshkruan procesverbalin e vulosjes së kutisë ku do të vendoset pajisja e identifikimit elektronik të zgjedhësve.

d) njofton menjëherë KQZ-në, për vendime apo veprime të KQV-së të cilat bien ndesh me manualin e përdorimit të pajisjes së identifikimit elektronik të zgjedhësve dhe procedurat e përcaktuara me aktet e KQZ-së.

Neni 9

Përgjegjësitë e operatorëve teknikë

1. Operatori teknik ushtron përgjegjësitë dhe përmbush detyrat e tij në mënyrë të paanshme dhe në përputhje të plotë me aktet e KQZ-së.
2. Operatori teknik është përgjegjës vetëm për përdorimin teknik të PEI dhe respektimin e detyrave të caktuara në nenin 8, të këtij vendimi.
3. Operatori teknik nuk ka rol vendimmarrës në lidhje me të drejtën e zgjedhësit për të votuar ose jo.



Data: 02.03 2021
Nr. 07

Për caktimin e personelit të kualifikuar për përdorimin e pajisjeve të teknologjisë së informacionit në qendrat e votimit.

4. Operatori teknik është përgjegjës për vënien në punë dhe përdorimin e pajisjes së identifikimit elektronik të zgjedhësve vetëm në qendrën e votimit ku është caktuar, sipas manualit të përdorimit të saj, dhe procedurave të përcaktuara në aktet e KQZ-së
5. Operatori teknik nuk ka të drejtë të përgatisë dhe/ose të administrojë dokumentacion, apo material zgjedhor.
6. Gjatë ushtrimit të detyrës, apo pas përfundimit të saj, nuk duhet të sigurojë, japë informacion apo bëjë publike për partitë politike, mediat, organizata të shoqërisë civile, të dhëna lidhur me ecurinë e procesit të identifikimit elektronik të zgjedhësve apo pjesëmarrjen e zgjedhësve në votime.
7. Operatorët teknikë mbajnë përgjegjësi civile dhe/ose penale për veprimet/mosveprimet e tyre në kundërshtim me kontratën dhe/ose legjislacionin penal në fuqi.

Neni 10

Ofrimi i shërbimit

1. Kontrata e shërbimit për punën e operatorit teknik për përdorimin e pajisjes së identifikimit elektronik të zgjedhësve, përcakton numrin dhe vendndodhjen e qendrës së votimit, ku operatori teknik është caktuar.
2. Kontrata e shërbimit parashikon edhe ndërprerjen e menjëhershme të saj në rast se operatori teknik nuk realizon përgjegjësitë dhe detyrat e përcaktuara në këtë vendim.
3. Operatorët teknikë për shërbimin e ofruar, përfitojnë shpërblim në masën 9 000 (nëntë mijë) lekë. KQZ mbulon shpenzimet e transportit për rastet kur operatori teknik ofron shërbimin jo pranë vendbanimit të tij.

Neni 11

Votimi i operatorëve teknikë

Operatorët teknikë votojnë pranë qendrës së votimit ku janë caktuar për të ofruar shërbimin.

Neni 12

Hyrja në fuqi

1. Ky vendim hyn në fuqi menjëherë si dhe publikohet në faqen zyrtare të Komisionit Qendror të Zgjedhjeve.
2. Kundër këtij vendimi mund të bëhet ankim në Kolegjin Zgjedhor të Gjykatës së Apelit







Data: 02.03 2021

Nr. 07

Për caktimin e personelit të kualifikuar për përdorimin e pajisjeve të teknologjisë së informacionit në qendrat e votimit.

Tiranë, brenda 5 (pesë) ditëve nga shpallja e këtij vendimi.

Ilirjana	NANO -	Kryetare	
Arens	ÇELA -	Anëtar	
Dritan	ÇAKA -	Anëtar	
Helga	VUKAJ -	Anëtare	
Muharrem	ÇAKAJ -	Anëtar	